

UNU FILU DE PAXI

S'ÒPERA DE IS ISCOLANUS ARRESINUS E TEULADESUS DE PORTO PINO EST ARRIBADA A VILLA DEVOTO

U

Un filo di pace, sa faina chi ant cuncordau is istudiantis de

Arresi e de Teulada, su 30 de làmpadas est arribada a Villa Devoto in Casteddu aundi dd'ant arricida sa Presidenti de sa Regione Alessandra Todde impari a s'Assessora a sa Cultura Ilaria Portas.

S'òpera, giai ammostada in Porto Pino su 5 de làmpadas passau, dd'ant fata is piciocheddus de s'Istitutu Cumprensivu **Taddeo Cossu**, imperendi su linu de Normandia e is arretzas de is piscadoris de Arresi e de Teulada, e dd'ant fata impari a is fedalis insoru de Tunisia, Frància e Galles cun sa punna de uniri, de manera simbòlica, is orus de mari aundi si incarant custus paisus pesendindi unu ponti de Paxi. Is rapresentantis de sa Regioni Sardigna ant acùlliu cun prexeri mannu su Filu de Paxi, faina simbòlica e cuncreta, chi in custus tempus malus chi seus bivendi fait a bessiri a craru su disìgiu de paxi chi nascit de is manus de is pipius etotu.



Su Filu de Paxi in Porto Pino - foto de Davide Marica

GIBA - MASAINAS

PRONTUS IS EVENTUS PO CUSTA ISTADI

Is amministratzionis comunalis de **Giba** e de **Masainas**, cun sa collaboratzioni de is assòtzius localis ant cuncordau unu programma arricu meda de eventus po costa istadi.

Masainas si cunfirmat sa bidda de is sagras: nd'ant prevèdiu 5 chi siguramenti ant a satisfai is amantiosus de is savoris de sa traditzioni. Nc'at logu puru po sa cultura: su **Festival LiberEvento** ddoi fait tres tapas e non tocat a si ndi

scaresci de su spàssiu dedicau a is mannus (ballus modernus e traditzionalis) e a is prus piticus (giogus in pratza).


Faint sagras medas fintzas in **Giba**: est pretzisu a sinnalai ca ocannu sa Sagra de su Pani lompit a sa de 30 editzionis. Est prevèdia animatzioni meda, giai incumentzada, dedicata a is prus minoreddus e fintzas mùsica, mostras artisanalis e su Giba Story Trekking chi in su mesi de cabudanni chi benit serrat su programma.

NUXIS

Su 18 de mesi de argiolas est acabada sa **de 6 campagnas de circa acheològica** in sa gruta de Su Montixeddu chi si agatat a intrus de su cumprensòriu de sa ex miniera de Sa Marchesa.

Ocannu ant partecipau 20 studiantis de s'Università de Casteddu, chi asuta de sa ghia de su professori **Riccardo Cicilloni** e de is dotoris **M. Cabras** e **F. Porcedda**, ant sighiu a allargai is sàgius giai fatus aundi ant agatau arrogalla de strexu de sa cultura de Monte Claro (2400-2100 a.C.) e fortzis ant agatau is ossus de una persona interrada. Duncas sa gruta, a bellu a bellu, est scoviendi a comenti is antenaus nostrus si funt postus meris de su territòriu e est comentzendi a si contai calincuna cosa de is credènzias religiosas insoru.

Comenti dònna annu est stètiu pretziadu su sustegnu logìsticu de su Speleo Club de Nuxis - ghiau de prof. R. Curreli e de s'Amministratzioni Comunali nuxaia chi at postu a disponimentu de is studiantis pendularis su mandiai e su logu po crocai.



S'INTELLEGÈNTZIA ARTIFITZIALI ARREXONU IN TRATALIAS

Su 1 mesi de argiolas in sa biblioteca de Tratalias ant arrexonau de intelligèntzia artificiali cun s'atòbiu "AI-VENTURA" scopri il futuro in biblioteca" po scoberri su mundu de s'intelligèntzia artificiali e cristionai de is scenàrius in su benidori.

Unu bellu eventù, apariciau de su personali de sa biblioteca in collaboratzioni cun s'espertu informaticu de sa coop Abilteco de Santadi, chi at tentu sa punna de spainai s'informàtica e, cosa prus de importu, trabballai po s'inclusioni.


Difatis **Alessio** e **Omar** ant fatu a biri a su pùbblicu - fatu de piciocheddus intra is 10 e is 13 annus - ita totu si podit fai cun s'I.A: de is testus a is immàginis e is vùdeus, ammostendi ca est de agiudu fintzas po is chi tenit disabilidadi fisicas e mentalis.

Is piciocheddus ant pigau parti a s'atòbiu cun curiosidadi manna e ponendi pregontas interessantis. Sa tecnologia currit a lestru e benit a marolla a dda poni avatu po no abarrai agoa: non ndi podeus prus fai de mancu de dda imperai in sa vida de dònna dii e duncas tocat chi is giòvunus puru cumprendant a cummenti dda oberai.

SANTADI

In Santadi ant fatu sa Festa dedicata a **Santu Sidòriu** protettori de is messajus: fiant prus de 50 is tratoris totu beni cuncordaus chi ant mòviu de pratza de crèsia e ant fatu su giru de su sartu cun don F. Sanna chi at benedixiu is campus. Sighit a essi una de is festas chi prus ddis praxint a is santadesus e chi pigant parti cun devotzioni.

Ma est tempus de festas fintzas in is àteras biddas sulcitanas: su 24 de làmpadas ant afestau a **Santu Giuanneddu** in Masainas, su 29 est tocau a is nuxàius e a is gibàius a afestai a **Santu Perdu**, patronu de ambaduas is biddas. Su 6 de mesi de argiolas ant afestau a...



In artu: unu momentu de s'atòbiu de Tratalias e s'essida de Su Cramu in Teulada; in bàsciu Santu Giuanneddu in Masainas e su prof. R. Ciccilloni in sa gruta de Su Montixeddu.

...a **Nostra Sennora de is Gràtzias** in su medau de Sa Crèsia in Sa Baronia e su 16 in Teulada ant fatu onori a **Nostra Sennora de Su Cramu** cun una bella prucessioni chi at prenu is arrugas de su centru stòricu cun is coloris de sa traditzioni.



Santu Sidòriu in Santadi

SA BARONIA

In Sa Baronia, su chi fiat su campu de bòcias - unu tretu in mesu de su popolau chi fiat mesu sbandonau de annus - oi torrat a bivi gràtzias a su sport e a sa partecipazioni de sa comunidadi.

Difatis ant cuncordau unu percursu de **calisthenics**, gràtzias a su contributu de su **GAL Sulcis** chi s'annu passau at bogau a campu unu bandu chi teniat sa punna de avalorai is tretus pùbblicus in is àreas ruralis.

Su logu est pentzau po is prus giòvunus ma fintzas po is mannus, is sportivus totus is ammantiosus de su si movi a s'ària libera. Est un'ocasioni bella po s'allenai e nci passai s'ora de manera sana.

Is amministradoris comunalis invitant a totus is citadinus a ddu provai e a ddu trasformai in unu logu de atòbiu nou po sa bidda.



REGIONE AUTÓNOMA DE SARDIGNA
REGIONE AUTONOMA DELLA SARDEGNA



Sa Bertula Antiga